

Mini conferencia ta cuminza awe **FONDO DI SOLIDARIDAD POR REMENTA AWE**

ORANJESTAD(AAN)—Awemerdia pa 2 or, inicio lo ser duna na e Mini conferencia, na cual tur isla y Hulanda lo participa.

Mientras ta ser spera cu otro puntonan di agenda lo no duna mayor problema, e fondo di solidaridad ta keda un punto explosivo, cu por rementa awe. Esaki en vista di e posicion di Hulanda, cu ta keda para ariba e punto di vista, cu tur contribucion Hulandes mester bini di e fondo di desaroyo pa e simple motibo cu Hulanda no tin mas placa ariba su presupuesto pa Antillas.

Segun opinion Hulandes ta keda na Antillas y Aruba pa realoca fondonan, esta escoge cual ta e proyectonan cu lo mester cay afor pa por acomoda e contribucion Hulandes den e fondo di solidaridad.

Aparentemente especialmente e islanan chikito lo bini fuertemente prepara awe, mientras cu di parti di e otro dos islanan tambe ta spera basta protesta. Problema ta eminente, segun informan-

tenan, aunke aparentemente ya ambtenaanan di Gobierno Central y di Hulanda lo ta preparando modelonan pa realoca fondonan.

Si awe surgi problema den e discusionnan entorno di e fondo di solidaridad, esey por significa cu e bom cu pa basta tempo ta bao di e conferencianan, por rementa, loke por significa cu realizacion di Antillas di Cinco lo tranca, y cu lo mester bay discuti alternativenan.


Informantenan na Hulanda a bisa ayera, cu no por spera ningun modificacion den e actitud Hulandes, y cu Hulanda a prepara su mes pa un posponimento di Status Aparte cu un año. Kico ta ser haci pa parti di Hulanda ta poco confuso, y e unico garantia cu tin na momento cu sinta na mesa awe ta, cu Hulanda lo no presenta un cent di mas di loke ya el a aloca pa e islanan cu ainda ta forma Antillas Hulandes.

REY DI TUMBA INFANTIL: LEONEL CROES

"Cu e pato den Carnaval"



Ayera nochi den RCA a tuma lugar, e festival di Tumba pa muchanan. Ganador a bira Leonel Croes cu e tumba E pato den Carnaval, composita pa Chinto Croes. Na segundo lugar a keda Susan Boekhoudt, cu Nos si ta bay gozè, y na di tercer lugar Hairo José Maduro, manera un diabel na pasta.



DIARÍ

DI ARUBA

Bo Matutino
Netamente Arubiano

DIABIERNA 8 DI FEBRUARI 1985 AÑA 4, No. 1250

DETENCION DEN CASO DI BETICO CROES

ORANJESTAD(AAN)—Segun informenan ayera autoridad a detene e homber M. kende lo ta ser sospecha di a ataca Betico Croes Diamars, den compania di B.

E dos hombernan a confronta Betico Croes den e restaurant Bali, y lo a propi- ne ciertò slanan na su cara.

For di antayera polis tabata en busca di e dos personanan, cu a amenaza tambe di tira Croes na awa. E acto di violencia a ser paraliza, y ayera pues autoridad a detene M.

ATENCION INTERNACIONAL PA BANDA DI DROGA

ORANJESTAD(AAN)—Polis na tanto Venezuela, como Colombia y Aruba ta den estado di alerta pa un banda di droga, cu lo ta moviendo entre e tres paisnan traficando e articulonnan prohibi pa ley.

Fuertenan generalmente bon na altura a revela na DIARIO, cu traficacion pisa di droga lo a tuma lugar entre Colombia, Aruba y Venezuela.

Autoridad di Venezuela lo ta sumamente alerta y e grupo di Disip lo a notifica autoridad Antillano tambe pa asina alarma keda bati na e islanan di Antillas y especialmente Aruba.

Segun informe, miembronan di e banda a ser sigui na tur e paisnan caminda nan a drenta y sali. No ta conoci te ayeranochi si nan a logra di gara un o otro sospechoso den e caso aki. Si lo ta asina cu lo ta trata di un lote considerable di droga.